



**Fundasaun Mahein (FM), 30 Abril 2021**

## **Komunikadu Imprensa**

### **PNTL nia Polisiamentu Komunitáriu no Dezafiu sira**

Implementasaun estratejia polisiamentu komunitária ne'ebé ho baze mai husi Lei Orgânica Polísia Nasionál Timor-Leste (PNTL). Introduz ho modelu VIP (Vizibilidade, Involvimentu, Profesionalizmu) mai husi PNTL nia Planu Estratéjiku hahu iha tinan 2014. Iha periodu ne'e, kolokasaun Ofisial Polísia Suku (OPS) ba suku hotu iha teritóriu tomak, no hari'i Konsellu Polisiamentu Komunitária (KPK) husi asaun komandu Munisipiu sira. Progresu esensial husi estratejia Polisiamentu Komunitáriu ne'e maka halo prevensaun krime no redusaun krime iha comunidade nia le'et iha nivel suku to'o aldeia sira. Progresu boot ida ne'e indika ona iha relatóriu dahuluk Avaliasaun OPS tinan 2018. Implementasaun estratejia polisiamentu komunitáriu husi OPS nia kolokasaun iha suku, iha relatóriu ne'e relata katak liu 80% halo comunidade sente seguru liu ho OPS nia prezensa iha suku.

Maske nune'e, monitorizasaun Fundasaun Mahein (FM) identifika katak PNTL nia polisiamentu kontinua hetan dezafiu sira sira aspetu sira lejislasaun nian, infraestruturá, rekursu umanu no fasilidade sira. Iha aspetu lejislasaun nian FM identifika tuir kuadru Planu Estratéjiku Seguransa Interna 2030 nian, to'o agora PNTL seidauk planu no direasaun ida ba PNTL 2030 nian (Polísia 2030), revizaun ba lei sira hanesan Lei Orgânica PNTL no Estatutu Pesoad PNTL nian, nomos Lei ba Konsellu Seguransa Munisipal nian.

Iha nivel munisipal sira, liu-liu OPS ne'ebe koloka ona iha suku 452 seidauk hela no servisu permanente iha suku tamba la iha infraestruturá hanesan uma, hela dook husi suku ne'ebe OPS koloka ba, OPS halo funsaun dupla (alein hanesan OPS maibe halo mos servisu iha eskwadra), formasaun ba lei sira no asuntu sira utilizaun ba teknolojia.

Iha sorin seluk kona-ba kna'ar sira kona-ba Konsellu Seguransa Munisipal (KSM) no KPK seidauk regula tuir lejislasaun nasional sira nia haruka. Iha ne'ebé dalabarak mosu konfuzasaun entre autor sira ne'ebé involve iha KSM no KPK, liu-liu sira nian kna'ar no kompetênsia sira. Iha ne'ebé involve la'os deit autor sira husi institusaun seguransa nian deit maibe mos institusaun seluk hanesan Ministériu Administrasaun Estatal nian no comunidade sira.

## **Rekomendasaun**

1. Rekomenda ba Ministériu Interior no Polisia Nasional Timor-Leste (PNTL) prepara Planu Estratéjiku Polisia nian ba 2030 ne'ebé hatuur ona iha Planu Estratéjiku Seguransa Interna 2030 kona-bá Polísia 2030. Planu Estratéjiku Polisia hodi integra Polisiamentu Komunitáriu nu'udar modelu polisiamentu PNTL nian.

2. Rekomenda ba Ministériu Interior no Ministériu Administrasaun Estatal kria lei atu regula funksionamentu sira husi Konsellu Seguransa Munisipal no Konsellu Polisiamentu Komunitáriu tuir kuadru Lei Seguransa Interna 2010 nian.
3. Rekomenda ba Ministériu Interior no Polísia Nasional Timor-Leste (PNTL) investe ba rekursu umanu no facilidade sira polísial nian hodi tulun servisu polísia nian sai vizivel liu tan.

Atu hetan informasaun kle'an liu kona-bá asuntu ne'e bele kontaktu:

**João Almeida**

Acting Director

Email: [almeidamahein@gmail.com](mailto:almeidamahein@gmail.com)

Telemove: (+670) 7756 1184

Website: [www.fundasaunmahein.org](http://www.fundasaunmahein.org)